

PLÊF DI S. MARIE SUNTE  
VISEPENTE  
(I) 3303I BASILIAN (FRIÛL)

Salût dal plevan

Come plevan di cheste glesie o saludi di cûr i zovins (ancje chei ch'a vivin fûr de nestre comunitât) che vuè a son culi per fâ la prime sielte veramenti personâl e responsabil come cristians. Che Diu ur deti il don dal so Spirt par ch'a vetin la gracie di jessi di peraule fint 'e ultime di de lôr vite. E sarà ancje la lôr furtune.

O saludi i santui, che e àn acetât l'onôr e l'inpegno di judâju in cheste aventure straordinaria.

O saludi i paris e lis maris che, cun sacrifici e amôr, e àn tirât su chescj zovins. A son e a restin i prins testimonis, cu la peraule e soledut cu la lôr vite. Un compit che no puedin delegâlu a dinisun.

O saludi naturalmentri il vescul di Zui e ausiliâr di Udin, Pieri Brollo, che al torne culi pe seconde volte, a cuatri angs di distance dal so prin incuintri cu la nestre realtât umane e cristiane.

J auguri che al puedi passâ chest moment cussi curt framieç di nô in serenitât e in pâs. Nol à di sintîsi un forest, ancje se il cristian al è par definizion forest in chest mont. Nol à di sintîsi nancje in tune comunitâ di frontiere, ancje se la glesie e scuën par fuarce jessi di frontiere, per podê lâ simpri plui indenant.

O sin une piçule comunitât che no à nissune intenzion di meti su une religjon per cont so. O sin e si sintin in comunion cun dute la nestre glesie furlane e cu la glesie sante di Diu. Dome che o domandin e o cirin di vivi cheste comunion a mût nestri, propit par faj un servissi 'e glesie e al mont. Chel che nol è se stes,chel che nol à nuje di so personâl e esclusîf, no dome nol è nuje ma nol à nancje nuje di ufrîj al mont.

Cheste nestre ricjerce di autenticitât, dificile, sufierte, limitade, no partis dal caprissi o dal gust de originalitât ma e intint ispirâsi ai doi misteris di fonde de nestre fede: a chel de Trinitât e a chel de Incarnazion.

La Trinitât e jè unitât te diviersitât e diviersitât te unitât. L'unitât, par no jessi formâl o muarte, e à di jessi su pocjis robis: pocjis e di fonde. Par lassâ spazi 'e diviersitât des situazions e 'e fantasie dal Spirt.

Cu l'Incarnazion, il Verbo di Diu al dismonte ju dal misteri de sô divinitât par inlidrisâsi tal misteri de umanitât. Crist al salve i oms diventant un om concret, çjapant su une muse, une lenghe, une culture, une storie. Dome fasinsi om concret al pò jessi model e salvadôr dai oms.

Cussì nô o cirin di fâ in mût che la fede si cali te nestre realtât storiche, culturâl, umane. No par umiliâl e o scjafojâl e o staronzâl ma par onorâl e perfezionâl. Come che Crist nol à disonarade la nature umane cuanche si è vistût di çjâr.

Al è par chel che nô o cirin di vivi la nestre vite spirtuiâl, religjose, culturâl, culturâl tal contest storic e gjeografic che Diu al à volût metinus. Par podê jessi nô stes e cussi zovaj al mont.

O sin une comunitât dismenteade, là che la int e passe conce fermasi, là che i zovins a sejanpin parceche un model economic vergognôs al continue a sassinâ lis piçulis realtâts par ingrassâ chei ch'a stan za ben.

Se continuâ a vivi culî, onorant lis nestrîs lidris ancje par judà chesc' zovins a frontâ il burlac di un mont massificant e banalizzant, al è un pecjât, o acetin di jessi pecjadôrs. Se invessit al è un at di virtût, o domandin di jessi rispjetâts e confuartâts.

Al Spiritu Sant, che vué al ven dât tal sacrament de Cresime, o domandin il regâl de sapience, par savê ce che no si à di molâ a nissun cost e ce che si à di jessi pronts a lassâ pierdi, par podê lâ indenant.

O metin i nestrîs zovins e la nestre comunitât tes mans de Madone, l'uniche cence magle. Jê che nus à puartât Crist, che nus puarti a Crist. Jê che e à cjantade la salvece di Diu pai puars e pai piçui, che nus judi a restâ puars e piçui par vê la consolazion dai jusc'. A jê, regjne dal Avent, j domandin che nus compagni al grant incuintri finâl e definitîf cun Crist, salvece dal om e de storie. Lui ch'al vîf e al regne tal misteri e te lûs de Trinitât. Amen.

Visepente, ai 8 di dicenbar dal 1991

pre Antoni Beline, plevan